

四庫全書

史部

欽定四庫全書

史部

廣東通志卷六十一

詳校官監察御史

臣龔麟文

檢討

臣德生覆勘

總校官檢討

臣

何思鈞

校對官中書

臣

王鍾泰

謄錄監生

臣

閻澧

欽定四庫全書

廣東通志卷六十一

藝文志三

詩集

梁

遊羅浮山

蕭譽

神哉蓬島合影羅岑南濱溟渤西負桂林龍隈斜峙牛
嶺旁升形高華霍德邁衡岷橫天起巘插雲生襲修崖

蔽景孤峰鳳立所謂耀真仙靈攸集鮑靚栖偃葛洪餌
丹梁盧王佐控鶴軒鸞翠袍挂日朱霞冒冠寶文可佩
冰玉宜餐羣生浮瞬隙電盈輝枝葉禮義黥劓是非無
因獨往山阿采薇吐納沖氣卷服雲衣無他利已骨竦
身跳至人齊物中還蘊妙灰心守一形枯道要史吹姬
笙嵇琴阮嘯桃出李傍李生桃側無俟相因李僵桃實
桃李雖榮終無久艷不摧松桂歲寒表色日惟一味安
止容膝神以動疲騎隨滿溢滿則敬淳真志畢積想

幽人羨茲正吉敢刻名山勒銘斯實

右四言古

齊

午日詠嶺外風土

魏 收

麥涼殊未畢
蜩鳴早欲聞
喧林尚黃鳥
浮天已白雲
辟兵書鬼字
神印題靈文
因想蒼梧郡
茲日祀陳君

右五言古

梁

遊羅浮山

江淹

紫烟世不覲赤鱗庖所捐白雲炎海外益益起三山蕭
瑟玉池上容裔羅山前欲知清都裏乘此乃登天

右五言古

唐

遊羅浮山

李白

桂水分五嶺衡山朝九疑江關杳安西流浪將何之素
色愁明湖秋渚晦寒姿疇昔紫芳意已過黃髮期君王

縱疎散雲壑借巢窠爾去之羅浮我還憩峨眉中閣道
萬里霞月遙相思

前題

劉禹錫

海黑天宇曠星辰來逼人言羅浮上容易見九垓漸
高元氣壯汹涌來翼身陰陽迭用事乃俾夜作晨咿喔
天雞鳴扶桑色昕昕赤波千萬里湧出黃金輪

前題

司馬退之

不踐名利途始覺塵土腥不味稻粱食始覺塵骨清羅

浮奔走外日月無短明山瘦松亦勁鶴老飛更清逍遙
此中客翠髮皆長生草木多古色雞犬無新聲去矣丹
霄路向曉雲冥冥

初南食貽元十八協律

韓愈

鱸實如惠文背眼相負行蠓相黏為山百十各自生蒲
魚尾如蛇口眼不相營蛤即是蝦蟇同實浪異名章舉
馬甲柱鬪以怪自呈其餘數十種莫不可歎驚我來禦
魑魅自宜味南烹調以鹹與酸芼以椒與橙腥臊始發

越咀吞面汗驛惟蛇舊所識實憚口眼猙開籠聽其去
鬱屈尚不平賣爾非我罪不屠豈非情不祈靈珠報幸
無嫌怨并聊歌以記之又以告同行

遊峽山

楊衡

陰岸東流水上有微風生素羽漾翠澗碧苔敷丹英重
林宿雨晦遠岫孤霞明飛猿相攀牽白雲亂縱橫有客
泝輕楫閱勝匪羈程逍遙一息間塵土五侯榮寧茗庶
蠲熱漱泉聊析醒寄言絲竹者詎識松風聲

以上五言古

楞伽峽

韓愈

江盤峽束春湍豪雷風戰鬥魚龍逃懸流轟轟射水府
一瀉千里翻雲濤橫浪卓龍相搏激湍湃急疾聲怒號
漂船擺石萬瓦裂咫尺性命輕鴻毛

端州紫石歌

李賀

端州石工巧如神踏天磨刀割紫雲傭剝抱水含滿脣
暗灑長弘冷碧痕紗帷晝暖墨花春輕漚漂沫松麝熏

乾臆薄重立脚勻數寸光秋豁日昏圓毫促點聲靜新
孔硯寬頑何足云

以上七言古

扶胥海

張九齡

海上生明月天涯共此時人情正遙暮竟夕起相思滅
燭憐光滿披衣覺露滋不堪盈手贈還寢夢佳期

過湏陽峽

張九齡

行舟傍越岑窈窕越溪深水闇先秋冷山晴當晝陰重

林間五色對壁聳千尋惜此生遐邇誰知造化心

坡山

李羣玉

五仙騎五羊何代降茲鄉澗有堯時韭山餘禹日糧樓
臺籠海色草木發天香浩笑烟波裏浮生興更長

度大庾嶺

張祐

萬里南邊客辛勤嶺路遙竹溪逢水弩野店避山魃瘴
海須求藥貪泉莫舉瓢但能堅志義白日甚昭昭

送陸協律之端州

賈至

越井人南去湘川水北流江邊數杯酒海外一孤舟
嶠同遷客京華即舊遊春心將別恨萬里共悠悠

以上五言律

畫不如樓

劉禹錫

行盡瀟湘萬里餘少逢知己憶吾廬數間茅屋閒臨水
一盞秋燈夜讀書地遠何當隨計吏策成終日詣公車
剡溪若問連州事惟有青山畫不如

崖州道中

李德裕

嶺水爭分路轉迷
枕椰椰葉暗蠻溪
怕衝秋霧巢蛇草
畏落沙蟲避燕泥
五月畬田收火米
三更津吏報朝雞
不堪回首思鄉處
紅槿花中越鳥啼

寄韓潮州愈

賈島

此心曾與木蘭舟
直到天南潮水頭
隔嶺篇章來華嶽
出關書信過龍流
峯懸驛路殘雲斷
海浸城根老樹秋
一夕瘴烟風捲盡
月明初上浪西樓

送羽人歸羅浮

曹唐

風前整頓紫荷巾歸向羅浮好養神石磴倚天行帶月
鐵橋通海入無塵龍蛇出洞閒邀雨犀象眠花不避人
最愛葛洪尋藥處露苗煙蕊滿山春

沖虛觀

胡宿

五粒青松護翠苔石門岑寂斷纖埃水浮花片知仙路
風遞鸞聲認笑臺桐井曉寒千乳斂茗園春暖一旗開
馳烟未勒山庭宇可是英靈許再來

送軒轅道士歸羅浮

李洞

仙山歸隱浪搖青綠髮雙瞳一帙經符帖布帆猿鳥背
鶴煎金鼎鬼神聽洞深頭上覺船過樓靜鼻中聞海腥
此處先生應不住吾君南望謾勞形

韶陽樓

許渾

待月江樓捲翠羅玉杯瑤瑟近星河簷前碧樹窮秋密
窗外青山薄暮多鳴鶴未知狂客舞鷗鷯先讓美人歌
使君不惜通宵醉勲業今看馬伏波

登越王臺

許渾

月流高岫宿雲開萬里歸心獨上來河畔雪飛揚子宅
海邊花發越王臺龍分桂嶺魚難過瘴近衡陽鴈却回
鄉信漸稀人易老只應頻向北枝梅

遊西樵山

曹松

百花成實未成歸未必歸心與事違但把壺觴資逸詠
盡教風景入清機半川殘霧籠寒樹一道晴蛻雜落暉
遊子馬前芳草合鷓鴣啼歇又南飛

題羅浮軒轅道士遺居

皮日休

亂峯四百三十二欲問徵君何處尋紅翠數聲瑤室響
真檀一炷石樓深山都遺負沽來酒樵客容看化後金
從此謁君知不遠求官先有葛洪心

以上七言律

經石門山

杜審言

石門千仞斷迸水落遙空道束懸巖外橋鼓絕澗中仰
攀人屢息直上騎纔通泥擁奔馳徑雲霾伏獸叢星躔
牛斗北地脉象牙東開塞隨行變高深觸望同江聲連

驟雨日氣抱殘虹未改朱明律先含白露風幽遐殊不
憚險澁諒難窮有異登臨賞徒為造化功

遊峽山

張說

流落經荒外逍遙此梵宮雲峰吐日月石壁淡煙虹寶
塢靈山湧懸龕造化功天香涵竹氣虛唄引松風簷牖
飛花入房廊激水通猿鳴知山靜魚躍辨江空靜默將
何貴所貴心鏡同

前題

沈佺期

覽偏名山境無如此峽山兩峯支碧漢一水抱清灣松
老龍猶在波澄勢自還煙蘿籠佛座風月伴僧閒騷客
吟無盡良工畫想難奇哉真福地千古鎮人寰

前題

宋之問

傳聞峽山好旭日棹前圻雨色搖丹嶂泉聲聒翠微兩
崖天作帶萬壑樹披衣秋橘迎霜序春藤礙日暉映潭
花似錦繞巔竹成圍寂歷還沙浦葱蘢轉石磯露餘江
未熱風落瘴初稀猿飲排虛上禽驚掠水飛牧童羹唱

合樵女越吟歸良候斯為美邊心自有違誰知望鄉國
惆悵失芳菲

登越王臺

宋之問

江上越王臺登高望幾回南溟天外合北戶日邊開地
濕烟全起山晴雨半來冬花掃盧橘夏果摘楊梅跡類
虞翻相人非賈誼才歸心不可見白髮重相催

泛石岐

鄭愚

此日攜琴劍飄然事遠遊臺山初罷霧岐海正分流漁

浦颺來笛鴻遠翼去舟鬢愁蒲柳早衣怯芰荷秋未卜
虞翻宅休登王粲樓悠然懷伴侶徒爾賦離憂

以上五言排律

宣溪

韓愈

韶州南去接宣溪雲水蒼茫日向西客淚數行元自落
鷓鴣休傍耳邊啼

開元寺

韓愈

橋夾水松行百步竹林禿席到僧家暫拳一手支頭卧

還把漁竿下釣沙

望闕亭

李德裕

獨上江亭望帝京
鳥飛猶是半年程
青山也恐人歸去
百匝千遭遶重城

以上七言絕

宋

遊峽山

蘇軾

天開清遠峽地轉凝碧
灣我來無遲速攝衣步屣
顏山

金史四庫全書
卷六十一
僧本幽獨乞食尚未還雲碓水自春松門風為關溪泉
解娛客琴筑鳴空山佳人劍翁孫遊戲暫人間忽憶笑
雲侶賦詩留玉環林深不可見霧雨霾髻鬟

巾峯晚眺

張栻

我聞路將軍威稜著湟水又聞韓吏部風流遺燕喜徘徊
巾山阿遐想千古意天池多黃埃憑欄頻徙倚

遊曹溪

文天祥

此行近千里迷復望西東行行至南華匆匆如夢中佛

化知幾塵患乃與我同有形終歸滅不滅惟真空笑看
曹溪水門前坐松風

以上五言古

遊羅浮山

習韶

羅浮山下江天碧琪樹夜寒秋露滴銀河倒瀉斗柄橫
畫船獨眠看月色聞道山中多羽人藥爐丹竈隨朝曛
截得龍蔥紫玉管碧桃花下吹晴雲桃花落地蒼苔紫
黍珠宮前暮煙起王母雲旗海上來鶴背松風浩如水

嗟予自是放浪徒瑤池青鳥應招呼何當結屋薜蘿上
淨掃朱霞觀玉書

以上七言古

棲霞寺

白玉蟾

海岸孤絕處晴河露遠汀潮花人鬢白山色佛頭青夕
照雌黃筆秋烟水墨屏天空杉月影鶴夢幾回醒

海珠

蘇軾

朝市日已遠此身良自如三杯軟飽後一枕黑甜餘蒲

澗疎鐘曉黃灣落木初天涯未覺遠處處各樵漁

遊峽山

高紳

古寺清江上維舟夕照前山根盤到海埕影直侵天蘿
月空禪石霜鐘落客船秋風懶回首送目入雲烟

遊惠陽西湖

陳堯佐

附郭水連山公餘獨往還疎烟漁艇遠斜日寺樓閒繫
馬芭蕉外移舟菡萏間天涯逢此景誰信自開顏

題端州郡齋

包拯

清心為治本直道是身謀修幹終成棟精剛不作鈞倉
充燕雀喜草盡兔狐愁往牒有遺訓無貽來者羞

登陽江望海樓

胡銓

君恩寬逐客萬里聽歸來未上凌烟閣聊登望海臺山
高翠浪湧潮拓碧天開目斷雲飛處終身愧老萊

遊銅石巖

胡銓

是處山皆石他山盡不如固非從地出疑是補天餘下
漏一拳小高凌千仞虛奇花應未見名不下中書

浦口

彭延年

浦口村居好柴門鎮不扃晴嵐深染翠寒筍嫩抽青酒
筆驅吟倦林風引睡醒東堂清且泚待創碧蓮亭

以上五言律

南水村

盧多遜

珠崖風景水南村山下人家林下門鸚鵡巢時柳結子
鷓鴣啼處竹生孫漁鹽家給無虛市禾黍年登有酒尊
遠客杖藜來往熟却疑身世在桃源

羅浮山

古成之

憶昔羅浮海上峯當年曾此寄遺蹤
凭欄月色出滄海鼓枕秋聲入古松
採藥靜臨幽澗洗寄書閒向白雲封
紅塵一下拘名利不聽人間午夜鐘

水簾洞

張鎮孫

岩堯仙境倚層丘百尺泠泠瀑素流
春長嫩莎成繡幕夜留新月作瓊鉤
澗邊雲護千年韭巖底涼生六月秋
欲訪安期何處覓藥爐丹竈且追遊

遊蒲澗

蘇軾

優鉢曇華豈有花，問師此曲唱誰家。
已從子美識桃竹，更問安期覓棗瓜。
宴坐林間時有虎，高眠屋後不聞鴉。
勝遊自古兼支許，為採松肪寄一車。

登浴日亭

蘇軾

劍氣崢嶸夜插天，瑞光明滅到黃灣。
坐看暘谷浮金暈，遙想錢塘湧雪山。
已覺蒼涼蘇病骨，更煩沆瀣洗衰顏。
忽驚馬動行人起，飛上千峯紫翠間。

重開西湖

林 堯

鏡奩平處小橋西
橋外輕鷗掠鏡飛
鑿破青雲放山出
撥開碧蘚引湖歸
帶煙插柳陰雖瘦
趁雨栽荷綠已肥
欲借禽魚祝君壽
君恩寬大此情微

峽山飛來寺

向敏中

峽山勝地安禪處
萬仞危橋壓要津
世上豈知名利路
浪中空笑往來人
倚門怪石狂遮面
入座寒雲碎遶身
日暮西風懶回首
滿林幽鳥語聲頻

前題

崔與之

萬里星槎海上旋
名山今豈得攀緣
猿揮孫恪千年夢
日照維摩半夜禪
磴長荒苔人跡少
崖攢古樹鵲巢懸
江流上溯曹溪水
時送鐘聲過洞前

潮陽海岸望海

楊萬里

動地驚風起海陬
為人吹散兩眉愁
身行島北新春後
眼到天南最盡頭
衆水更來何處著
千峯赴此却回休
客中供給能消底
萬里烟波一白鷗

以上七言律

靈洲九曜石

程師孟

何人移巨室終日壓寒泉不逐千秋改長如九曜連森
然禹州牧儼若舜官聯春浴多沂水霄占盛潁川舟疑
槎汎到橋訝鵲飛填暗向吹笳後明於秉燭邊風濤撼
莫轉霜霰蝕難穿可繼元章嗜無由靖節眠廢興時自
異終羨爾長年

坡山

古成之

元元分古觀南鎮越王城五石空留穗羣仙不記名丹
砂雖久鍊雞犬自長生楹簇鰲頭景門通鶴蹊程煙霞
沿砌起花木逐時榮古井涵虛碧疎鐘入竹清荒蕪延
野色寒溜引秋聲丹竈封苔老芝田積雨平風光齊岳
麓音信接蓬瀛願得身從此乘雲到玉京

以上五言排律

曹氏園亭

寇準

野靜長原迴亭開夕吹清登臨時一望海樹與雲平

鵠奔亭

郭正祥

新江自南來西與端江匯屹然奔鵠亭遺意溢千載

堯山

米芾

信矣此山高穹窿遶朝市暑木結蒼陰飛泉落青翠

以上五言絕

遊蒲澗

季陵

飛泉一派木千章九節菖蒲澗底香拔宅不留雞犬在
至今無處問仙方

遊峽山

郭正祥

舟繞蒼苔轉碧津
層層雲水畫屏新
分明便是桃源路
底事無花不見人

金鎖潭

方信儒

西來畢獸路應迷
金鎖何年落此溪
不比李侯心似水
歸舟猶擲石門西

遊羅浮山

周惇頤

紅塵白日少閒人
況有緋魚繫此身
獨上羅浮開遠目

浩然心意復吾真

飛泉嶺

朱熹

梯雲石際羊腸遠轉壑飛泉碧玉斜一落風煙春淡薄
數聲雞犬野人家

以上七言絕

元

東山廟

林宗山

直氣神如在常為此地靈拓開千仞峻巍鎮一峯青劍

戟依瑤砌龍蛇蟄翠屏
愆陽或時作憑仗起雷霆

三洲巖

陳曄

三洲巖洞勝名里領東西
拂拭瀟溪字摩挲玉局題
高明窮賞覽
歎仄費攀躋
恍若登仙舉
歸來興欲迷

以上五言律

飛來寺

賈煥

五嶺雲霞簇萬峯
峽川風月浩無窮
兩山矗起排神劍
一水中流走玉虹
古刹飛來仙跡在
妖猿化去世緣空

歸舟却遇重陽近林下黃花識退翁

湖光巖

曾留遠

天風吹送入閩船來結遊湖未了緣一徑僅容飛鳥過
四山如護老龍眠禪心秋月寒潭外客思孤雲夕照邊
却笑梁谿元不到清吟空抱斷碑傳

以上七言律

越王臺

許有壬

問俗來南海休期上越臺際天迷蒼茫拔地起巍崔五

管衣冠府連城錦繡堆勢吞蒲澗遠氣壓海珠摧嶺嶠
橫卷石滄溟瞰一杯人驚塵世隘鳥盡碧天迴霧列番
中國雲摩船上桅黑風鯨浪立紅氣蜃樓開市貨煩重
譯蠻琛盡九垓緬思椎髻子徒困島羈財下瀨纔分節
雕甍又劫灰我行求古蹟天遣度詩材長嘯魚龍駭遄
歸鼓角催遠遊心未已東北是蓬萊

右五言排律

明

遊曹溪

周 瑯

崎嶇厯山谷窈窕經林丘
廣川相縈帶梵境迴以幽
金光蕩松筠鐘磬雲間流
苔痕交虎跡塏影沈龍湫
依依示化身鬱鬱祥煙浮
撫念得深省榮利非所求
安得逐羣衲從此事焚修

遊羅浮山

陳 璉

仙山鬱嵯峨千古青未了
樓臺起中天鐘磬出林杪
奇花散仙葩五色翔神鳥
誰能躡高頂洞覽周八表

前題

林挺

神山浮海來上與星辰通
司命佐南嶽作鎮滄溟雄
雙樓岼危石鐵橋亘天中
巖端漱飛泉瑤臺錯玲瓏
靈譎信超越玉簡闕神功
誰其冥寂士來此訪玄風
丹砂尚恍惚仙書未易逢
俯拾金芝英仰攀瑤樹叢
梯雲望出日扶桑生海東
天雞鳴中宵寒波澹溟濛
明霞太親人直接蓬萊宮
不恨隔中州走望禮羣公
不邇聲利途逋客絕遊蹤
亮哉美吾土長願偃微躬

登越王臺

黃佐

精廬展良晤勝地紆玄覽舍輿躡風磴聯袂度雲崦粵
臺一以陟遠翠紛可擘瀟瀟雨初霽冉冉日欲暝川光
溢寥廓野色開黯慘長謠出金石英論照肝膽於言謝
羈束何必理鉛槧沈冥聖所珍傲睨吾豈敢憑林悟榮
悴步壑玩流坎

鶴舒臺

黃佐

天池集南翼帝車迴北衡芳草寒未歇潦川憺猶清晏

陰日夕起鬱抱何由平朔風肅徂軫陟雲延友生周遭
度元渚紆徐蹇落英晨霞散餘絢條忽凌虛明虬松移
翠葆虹澗流金聲轅馬何蕭蕭谷鳥亦嚶嚶蘊真效龍
螭撫化忘將迎靈樞一永歎遠壑浩自盈緬惟遼海鶴
載彼瑤臺笙邈矣安期子迺垂千載名

前題

黎民表

安期鍊玉液飛步凌紫霄空餘璇臺上千古鬱宮堯金
床鎖靈穴碧樹敷英翹鸞笙空縹緲鶴馭徒逍遙物化

迹逾勝理愜境自超願弭雲中駕隨君揮碧寥

遊白雲山

黎民表

靈嶽奠南溟鵬翼矯而峙上干矚斗樞下盤絕地理修
阪饒希苓迴蹊蔭梗梓東觀極扶木西窺逼濛汜晨標
頽霞截夜氣白虹起玉樹發葱菁金潭耿清泚平生信
經奇茲山擅巨美圖史謾莫傳倜儻固難紀倘驟飛鸞
翔長揖當逢子

遊西樵山

趙志臯

赤輪躍東桑褰帷入西麓直矗躡高岑紆迴度幽谷浮
海四茫茫攢峯數六六林翳晝常陰雲深樹如沐碧水
淨烟嵐懸厓倚茅屋老叟解逢迎兒童喜相逐卜築忘
歲年問俗去寒燠朝日下橫江丁丁聞伐木迤邐白雲
窩千尋瀉飛瀑追蹤烏利巖仙人曾辟穀我亦愛樵居
無緣能信宿把酒握同心登眺以舒目

前題

歐大任

弱齡誦圖經雅志愛丘壑良朋訂遠遊名山赴幽約杪

秋天宇清始至諧夙諾心邁易躋攀步健輕崙嶸曉行
陟諸峯周覽凌峻削晶晶浮氛斂霏霏寒氣薄霜木聳
嶽高風泉灑空落跡絕洞疑局雲攢岫如幕寥蘿上松
門臨平出烟閣桂叢隱可招暫托幽人樂地遠聲總銷
谷虛神更躍眷言懷昔賢來者視猶昨窅然得天遊何
用耽微爵畢婚非達言從此訪靈岳

遊西樵碧玉洞

區必傳

杖策恣遨遊相從在浚谷洞口白雲生天際巖如屋瀑

布掛崖間飛空作碧玉長似江流聲還如烟霧簇幽人
獲其趣仰卧觀不足采彼澗中蒲泛觴石泉曲吹笙應
空山幽響恒相逐狂笑任所之沿流攬秋菊共唱紫芝
歌遙慕綺與角

遊石室山

韓 雍

二氣初盪空清勝迴幽絕清濁旣分判崆峒見巖穴初
登覺幽深旁轉更高潔嶙峋起玉柱繚繞垂彩纈寒溜
浮空明巨石羅曲折逢逢擊地鼓洪響不外泄乃知化

工神難與俗儒說丹青雖巧誰能寫奇絕良辰羽書
稀聊此一怡悅辱我同心友款留出佳設坐久毛骨寒
恍如在水雪舉觴初引滿浩歌激壯烈丈夫感知遇圖
報心孔切所愧才德劣弗能紹前哲正誼不謀利臨事
秉大節仰視蒼蒼天此心誓如鐵

前題

陳獻章

我行蒼梧野息漿端江湄郊行縱遠眺石室涵晴暉前
哲有題蹟拭目往讀之徘徊東壁下髣髴元公遺今古

一相成光風吹我衣蟲鳴丹竈中葛仙胡不歸圓蟾夜
炯炯蝙蝠秋飛飛願言託高樓行矣無是非

前題

楊載鳴

平生丘壑心所歷窮地紀茲巖鬱靈秀混沌窺無始玲
瓏劃朗豁懸綴出瓌詭晦映日月華合沓雲烟靡通天
信有門隕星差可擬撐拄疑神功空閔悟名理歲晏瘴
氛銷山川氣清美旣協賞心緣復遘良朋喜危坐俯虛
無劇談淹景晷流霞滿尊壘元氣隨杖履頽然成夢遊

金定四庫全書
卷六十一
邂逅洪崖子恍惚持銅章殷勤遺石髓期我閨風岑長
笑謝紛滓覺來牽簪裾徘徊暮山紫

以上五言古

廣州歌

孫 蕡

廣南富貴天下聞四時風氣長如春長城百雉白雲裏
城下一帶春江水少年行樂隨處佳城南南畔更繁華
朱樓十里映楊柳簾櫳上下開戶牖閩姬粵女顏如花
蠻歌野曲聲咿啞荷莪大舶映雲日賈客千家萬家室

春風列屋艷神仙夜月滿江聞管絃良辰吉日天氣好
翡翠明珠照烟島亂鳴鼉鼓競龍舟爭睹金釵鬪百草
遊冶留連忘所歸千門燈火夜相輝遊人過處錦成陣
公子醉時花滿堤扶留葉青蜨灰白盆釘檳榔邀上客
丹荔枇杷火齊山素馨茉莉天香國別來風物不堪論
寥落秋花對酒樽回首舊遊歌舞地西風斜日澹黃昏

遊西樵噴玉巖

歐大任

天泉百道下晴潭淙淙西嶺霾烟嵐跳珠翻雪不知數

獨稱噴玉千丈巖噴玉天泉水源從山上起倏看閃電
來半在青山裏灑流橫激濕行雲濺沫時驚過鳥羣征
颿萬里吹難斷浩月三更影不分初疑白鸞在樹出更
疑寶劍倚天立左淥右射洗青空顏崖快瀉雙石硤幾
見欽崙下赤日遂令瀕洞來寒風曾聞天台之南雁宕
北絕巘飛泉削蒼壁偃蓋低飄萬樹松明霞削映五色
石匡廬九疊屏風張銀河倒挂三石梁香爐鬱葱吐雲
散瀑布天矯驚龍翔合山廬岳遙相望我昔扁舟恣長

往玉巖之水澄我心歸來福地何蕭爽漱石枕流奚所
營朝餐金液暮赤英仙人招我彩雲裏便御茅龍朝太
清

前題

梁柱臣

層巒合沓嵐煙簇玉龍卧斷蒼山隩曉吸滄江百尺瀾
却向巖前濺飛瀑噴沫流珠下翠微千巖錯落散明璣
聲傳石竇逶迤轉白滿寒潭厯亂飛精融液洩氣慘烈
萬古清秋長不竭初疑雲雨暗巫陽轉訝梁園夜飛雪

遙空隱隱半如雷，坐令疊嶂無氛埃。
直窺素練煙中起，却似銀河天際來。
深濤洶湧沸絕壑，磴戶無風自揮霍。
觸石浮雲凍不翻，當窓木葉先秋落。
落落葉亭亭亂晚霏，絕憐空翠濕人衣。
別有清流斷肌骨，龍吟石上涓涓出。
紛披百道下松風，月明幾處翻蕭瑟。
竭來濯足茲山頭，髣髴如寄匡廬遊。
水簾石室無滄暑，披襟兀坐清煩憂。
下看埃壒一長笑，千山日暮斷猿愁。

遊西樵山

李待問

昔聞西樵之峯七十二，龍從削天出平地。金甌山勢蜿蜒開盤互，其中四十里校書題破青山色。留得遊人供宿醉，露毫風瓢結伴行為向。層巒曠盈視春當二月，花氣迎拂林低靄。如有情，丹梯遠接翳門上，夾道草色春風生。此山由來嶺外奇，不到山中迴不知。黃雲孤邈擎仙掌，滄海光涵浴日池。上為雲屏玉峙，七星浮黛以蔽虧。下為噴玉飛簾，千山濺雪而寒漪。石梁倒挂明珠璣，素濤飛舞雙白螭。中峰遙接天柱，眉雷壇火益多累垂。

雞聲鳴午雲間出桃花流水何參差仰天長嘯振衣立
大科小科如拱揖洞拂蓬萊疊錦張石綻芙蓉空翠濕
相傳烏利鑱金砂銀井留丹覆絳霞又傳紫姑服日華
素煙玉女明三花羣真遙來聚窟宅遂令窈窕成幽遐
孤懷寂寂松風石搔首臨臯如夙昔夕陽佳色款荆扉
春送香風生兩腋每道銀魚妨賞適草堂猿鶴憐乖隔
勝情空復留塵跡長使山靈笑逋客何時攬浮丘之袖
兮接安期之舄瑤草春深挂蘿席方丘原自足煙霞又

奚事於朝期五岳兮暮馳七澤

遊石室山

梁 敏

七星何年隕為石壯觀南溟鎮坤極平原散作青蓮花
元氣淪渾護蒼碧巖巒聳峙爭嵯峨杓行直上聯奎壁
洞然一室張虛明高越匡廬幾千尺騰龍躍虎分形勝
勢擁浮嵐轉昕夕峯稜側立磨劍石上割烟霞斷鵬翼
雄觀偉視足奇怪擎天衆柱排雲直蓬萊之山在何許
此境尤為人愛惜苔花疊錦燦石文鍾乳垂珠散膏液

涼蟾清吹颯秋意異草名葩自春色憶從天地開闢初
滄海桑田幾更易巖中神仙何渺茫巖前版築留遺跡
古人遊覽為盛事地靈人傑今猶昔皇華使者乘驄遊
澗谷林巒總光飾臨花傍柳開綺筵拂苔灑墨詩無敵
巖居老人深感激再拜向前訴衷臆乃言巖龍長晏眠
一春霖雨無消息使者奏奉上帝勅呼之起布陽春澤
生民早得服田畝濕衣飽食咸帝錫我生世住靈巖前
歌頌太平昭聖德

峽山飛來寺

朱燮元

吳中已覩飛來峯，嶺南再陟飛來寺。
地靈天巧滿八區，河徙山移或有此。
矗矗千峯兩岸環，白虹吐吞山之間。
磨角神龍杳莫見，斷鎖靈犀不出潭。
竹蘿朱槿風瑟瑟，更飄暮雨似巫峽。
官舟毒熱未能揮，羨爾雙鳥隨老衲。
老衲支筇指上方，爛然錦石流璫漿。
勸我一杯撐腸飽，立生羽翮凌空翔。
吁嗟葛壇堆剝翠，和光洞口榴花蔽。
世上虛傳跨鶴圖，壁間休讀歸猿記。

以上七言古

海珠

湛若水

孤根分穗石樹影帶城堤泛泛星槎外荒荒日馭西兩
崖烟火斷一笑海雲迷便欲依僧寺終同野鶴棲

石門山

陳獻章

白髮非公事扁舟進此門山雲寒不雨江路曲通村匡
世吾何有長途馬不存曉來堪一醉山月照空尊

遊靈洲山

倫以諒

爲愛黿峯勝靈洲閣影蟠東南觀欲盡天地若爲寬雲
樹閒清晝江帆亂激湍山川迂歲月風雨又凭欄

前題

皇甫渙

憶昔金山寺重來海上遊亂帆飛遠近幽鳥自沈浮兩
岸疎鐘度千村宿雨收東坡臺上望芳草不勝愁

前題

倫以訓

江山一梵宇塵外幾仙家日抱黿鼉窟水通星漢槎虛
臺橫碧落細路轉丹霞且莫催留滯中泉好試茶

前題

黎民表

荒臺圍樹色孤石纜雲根
野水寒侵岸漁舟夜到門
霜風閒共倚沙鳥靜聞喧
不寐看山月秋光滿給園

遊西樵雲谷

黎民表

何年招隱處綺構出林端
地因霞外僻天到谷中寬
石磴蒼烟濕雲門白雪寒
有約重攜手高臨百八盤

題玉池釣臺

曾仕鑑

龍池臨釣石初月似勾沈
松壑流雲濕花源積翠深
觀

魚知自樂馴鶴伴誰吟未是終焉計逃虛有足音

白雲洞

李德

峽雲藏絕壁峽水積寒流寶樹籠香閣天花散彩樓梵音清隱隱鐘韻晚悠悠更有金仙宅飛來最上頭

度大庾嶺

何維栢

梅關山色舊蒲石未寒盟古木堪垂釣江門好濯纓片雲浮世界孤月澹滄溟八極神遊遠悠悠得此生

海珠

徐章

盤石臨江上樓臺駕海隅車塵應不到鷗鳥自相呼勢
壓蓬萊島光含合浦珠中流如砥柱潮水幾盈虛

遊西樵山

霍與瑕

天晚度山南荒丘歇小驂雨花封短磴烟樹鎖澄潭邃
閣盈新鮮遺書憶舊函昔年庭訓地回首可能堪

海珠

孫永思

慈航今利涉始識海珠宮鷺嶺中流出鯨波四望通松
亭籠曙色鐵笛響雲空莫惜相逢飲奇遊屬此中

遊西樵

鄒善

蠟屐春來理乘閒陟上方雨餘山色潤風過鳥聲長野
老雲中下巖居世外藏何時重攬秀擊壤共徜徉

海珠

李時行

島嶼中流出憑虛結蜃樓浪翻沙際月楓落海門秋照
水禪燈寂棲雲祇樹幽坐看神女見清夜弄珠遊

登越王臺

梁有譽

越臺枕郊郭吟眺喜逢秋山向庾關斷江從鬱水流菊

湖荒草沒花塢夕陽愁極目雄圖外蒼蒼雲樹浮

遊白雲山

區大相

昔聞採藥去過海訪蓬壺尚憶如瓜棗難尋九節蒲泉
聲清澗壑鳥道轉虛無玉舄留秦代飄飄鶴駕徂

白雲洞口號

葉春及

洞晚雲隨入巖秋雨自飛莫愁霑野席猶得浣塵衣歲
月吾將老烟霞興不違昔年招隱處叢桂可同歸

遊西樵

孫光祖

海上留仙島如從物外遊
風迴烟景換溪轉水聲幽
澗石和雲煮山茶帶露收
門無催稅吏何處覓丹丘

遊曹溪

林如楚

谷暗樹重重人稀見虎蹤
引泉僧荷鍤聽鳥客扶筇
勾漏還堪問桃源似可逢
莫愁歸路晚明月在西峯

前題

袁昌祚

為愛曹溪勝郵亭晚泊船
行隨僧錫入坐想佛衣傳
樹色深圍寺山腰細引泉
眺遊情不厭翻欲息塵緣

宿峽山

陳子壯

東峽行方峻沿江路欲迷水光疑兇伏嶂靜覺猿啼風
觸松根轉星浮石角低從來思設險他日罷征西

以上五言律

遊峽山

孫賁

明日青陽逼歲闌繡衣聊得共躋攀雲鋪鶴背浮金殿
風引猿聲嘯玉環薄宦豈堪重作客故鄉惟有一登山
藤床睡殺梅花月輸與蒲庵老衲閒

遊羅浮

孫賁

四百峯巒江海上飛雲絕頂敞玄都
丹砂五色時光現
紫翠中天半有無
觀裏松枝常駐鶴
山間竹葉盡成符
鐵橋歸去多真賞
爛醉仙人白玉壺

遊峽山

黃哲

峽束滄江萬壑雷
梵王樓閣倚天開
山從中宿城邊起
水自連州港上來
風葉捲時猿獻玉
雨花飛處客登臺
青鞋未訪和光洞
奏賦金門亦壯哉

韓龍

金幼孜

重泛仙槎憶舊遊
酒酣乘興獨登樓
隔溪好鳥啼烟樹
兩岸殘陽送客舟
懷古山川關雅興
憑高天宇豁凝眸
昌黎勝槩今何在
惟有寒龍東自流

五指山

丘濬

五峯如指翠相連
撐起炎州半壁天
夜盥銀河摘星斗
朝探碧落弄雲烟
雨餘玉筍空中現
月出明珠掌上懸
豈是巨靈伸一臂
遙從海外數中原

粵秀山

倫以諒

攀蘿猶覺苧衣單
短壑松陰午亦寒
孤鳥帶風來郭外
片雲浮雨過江干
高低遠樹如烟織
濃淡青山入畫看
萬里晴空堪眺望
晚來杯酒正交歡

登大科峯

方獻夫

晚來偶發登臨興
策杖高凌絕頂頭
盡見百川歸大海
却疑諸嶺在平丘
拂雲天外觀何極
選石松根坐不休
一枕借眠誰可共
幾回飛夢到羅浮

遊觀翠巖

方猷夫

振衣誰上紫雲頭
借濯瑤池萬古流
蒲菊何心穿石峭
松梅得意倚巖幽
層崖翠引千山嶂
虛壑空生六月秋
九曲武彝何必問
因君閒憶訪方舟

遊靈洲山

霍韜

入眼浮漚見此臺
嶺南佳勝自天開
何人兩屐松根出
千載孤舟夢裏來
枕石老龍三月睡
高岡鳴鳳幾時回
憑欄吟望情何極
近浦吹笙曉棹催

遊羅浮

湛若水

聞歌一夜動幽懷
直踏飛雲萬丈崖
翠靄浮空白日暝
虹橋有路青天來
三月二月春之半
千山萬山花正開
笑問仙源杳何許
雲濤浩浩不堪裁

謁增江祖祠

王守仁

海上孤忠歲月深
舊壇荒落杳難尋
風聲再樹逢賢令
廟貌重新見古心
香火十年傷旅寄
烝嘗兩地嘆商參
鄰祠父老皆仁里
從此增城是故林

鎮海樓

何維栢

兀兀層巒控海樓
仙城繚繞跨浮丘
雲封野寺三千界
風度長空萬里秋
極目星河依北斗
迴瀾砥柱屹中流
登臨莫謂炎方遠
鄒魯年來是此州

遊白雲山

何維栢

登臨地迴三城盡
紫翠烟深一逕微
雲淨九龍依洞出
臺空孤鶴向人飛
千山佳氣還依樹
萬壑涼飈故拂衣
悵望清秋情不極
皓歌回首月斜暉

菩提壇

何維相

清齋飯罷暮鐘時
塢裏傳燈樹影稀
僧在上方秋寂寂
月生東海夜遲遲
風搖著相心先動
明鏡非臺性自知
却笑黃梅留偈別
三更衣鉢使人疑

鎮海樓

黎民表

朱甍畫棟逼星河
秋色蒼然隱薜蘿
地轉青山開越井
天懸綠水下牂牁
憑欄漸覺清商冷
顧影其如白髮何
烏鴈有懷成悵望
浮雲西北晚來多

遊蒲澗

黎民表

青林窈窕絕塵氛一派釣天下界聞龍去不收千日雨
鶴來還動滿溪雲山瓢祇獻長生酒石室應藏內景文
歸去幔亭何日到緘書先報武陵君

遊浮丘山

黎民表

解組南歸問五湖昔遊風月未曾孤閒攜天祿青藜杖
來坐仙人白玉壺碧海蓬萊今不遠丹砂勾漏豈全無
前身恐是浮丘伯勝事重逢蔣大夫

遊石室山

黎民表

白玉樓中貯列仙，浮來滄海是何年。
風塵半出窓前地，日月雙懸袖裏天。
苔雜雨花生坐榻，澗含春溜入平田。
輕舟欲采芙蓉去，觸散芳湖九點烟。

鎮海樓

梁有譽

丹丘裊裊虛無裏，下界遙看紫翠重。
星斗暮懸溟海樹，烟霞秋斷越山鐘。
五前風景非秦代，樓外關河盡漢封。
搔首白雲應可掇，誰騎黃鶴躡仙蹤。

金匱山志
卷六十一
遊蒲澗

梁有譽

磧道秋生松桂風
泉聲飛下綠雲中
何時天外招黃鵠
此日巖前看白虹
露濕野壇丹井合
苔昏荒徑菊湖空
興來負笈歸何處
五嶽迢遙路不窮

遊羅浮

梁有譽

縹緲丹梯萬仞餘
風塵回首列仙居
石樓積翠臨滄海
鐵柱龍泉落紫虛
鸛鶴凌霞時自度
松苓滿地日堪鋤
何當歸訪葛洪去
四百峯頭好結廬

東臯

李東陽

日日沙頭看鳥飛
柴門剛枕釣魚磯
鶴鳴驚見海穿月
客笑不知風滿衣
鄰舍牆邊呼酒近
故人天上寄書稀
從今小隱須稱大
新向長安市上歸

鎮海樓

孫永思

粵王臺接五層樓
極浦名山傍古丘
瘴海波濤浮日月
炎江風雨自春秋
亂帆歸晚歌相應
綠樹含烟翠欲流
莫向危欄聽吹笛
武陵離思在南州

遊峽山

孫永思

峻閣層欄俯碧流，峽山佳勝冠南州。
烟霞日抱魚龍窟，松桂高含帝子樓。
石壁題詩空暮鳥，飛來風雨定何秋。
故山猿鶴盟原舊，悵望青雲笑去舟。

鎮海樓

李時行

縹緲飛樓高接天，窗臨星斗望中懸。
浮空雪浪三江口，映樹晴霞五嶺前。
草長粵臺連野色，花深藥圃暗春烟。
倚闌極北頻回首，遙指長安在日邊。

遊峽山

王佐

紫殿金光滿九霄，魚龍峽裏駭波濤。
夜聞風雨空山動，曉見雲霞別殿高。
靈鵲翱翔棲未定，野猿颺颺去還號。
昨遊綠鬢今如雪，莫怪栽松鶴已巢。

遊峽山

陳獻章

孤舟昔繫飛來寺，白首重來十四秋。
若有西風吹綵鷁，何如老子坐青牛。
留情世事終難補，得意雲山亦易休。
見說夔龍滿朝著，九重應許放巢由。

舟經西樵

陳獻章

青谿落日江濛濛
百丈曳過樵嶺東
萬里山河秋色裏
滿船笳鼓浪聲中
衰顏下照波濤日
幽思長吟島嶼風
却望蒼梧在何處
東籬今負菊花叢

登浴日亭

陳獻章

殘月無光水拍天
漁舟數點落前灣
赤騰空洞昨宵日
翠展蒼茫何處山
顧影未須悲鶴髮
負暄可以獻龍顏
誰能手抱陽和去
散入千崖萬壑間

前題

王漸達

雲磴霏微紫翠環，清秋載酒一憑闌。
江山對客還如識，風雨欺人故著寒。
地軸半隨南極盡，海潮多趁暮天寬。
却從浴日亭邊望，絕勝羅浮夜半看。

遊峽山

周振

兩岸嵐光擁翠岑，飛來蘭若在山陰。
香飄花雨諸天近，路入松蘿一逕深。
猿送玉環歸野洞，僧翻貝葉坐雲林。
觀風幾度閒登覽，踏破烟霞發浩吟。

前題

黃光昇

落日維舟訪古臺萬山過雨正春回
林間石出侵雲上檻外江流到海來
地迴時聽仙管度心清暗覺寶花開
三千世界本寥廓九萬鵬歸寧用催

前題

吳國倫

一線江流萬仞山嵐烟迴合隱禪關
佛來自擁青蓮座猿去空遺碧玉環
幽逕薜蘿穿象上方鐘磬落雲間
波銜片月龍宮吐兩岸芙蓉可盡攀

前題

羅洪先

飛來古寺枕江邊
鐘鼓微茫樹接烟
千點落花寒食雨
數聲啼鳥夕陽天
妙高臺上多遺草
如意亭中有太玄
我是九霄雲路客
豈應疎懶傍魚船

前題

趙志臯

天削靈山福地開
舒州何代此飛來
兩峯高並青霄逼
一瀉中泠碧玉迴
釋子西來曾掛錫
仙翁南訪舊登臺
行過愧我風塵色
日暮諸天首重回

遊浮丘山

趙志臯

仙人吹鳳去山中縹緲神丘有路通
渤澥已非珊井在莓苔深掩石壇空
移官愧比西湖長策杖欣逢北海翁
遙望九天佳氣鬱扶搖還擬問鴻濛

遊白雲山

王弘誨

一上名山石磴懸禪宮高倚翠微巔
江波泱莽晴常雨海霧蒼茫斷復連
緱嶺似乘鸞鶴下仙槎真泛斗牛旋
不須方外尋真訣自是人間別有天

遊靈洲山

王弘誨

海上青山一柱孤，寶陀雲擁巨鼇扶。
天連瓊島迷吳岫，地控珠江鎮粵都。
千古衣冠曾表郭，百年風韻尚傳蘇。
登臨莫問前身事，作賦空慚漢大夫。

遊羅浮

王弘誨

何處神山四百峯，丹梯萬仞削芙蓉。
瑤臺積翠臨腸谷，鐵澗飛泉瀉玉宗。
丹洞雲深留鶴馭，澄潭秋漲蟄蛟龍。
七飛擬鍊超塵劫，桂父安期信可通。

題五指山

王弘誨

地盡南溟氣復連五峯如指勢擎天
浴光應捧咸池日
染翠疑探太乙烟瑤島露分仙掌湛
寶輪花傍佛支懸
寰中諸嶽分羅立誰向鴻濛握化原

前題

王世貞

東南欲盡覺天寬矗立高標障海瀾
掩日修羅雲外掌
摩空銅柱露中盤削成華嶽峯峯秀
寫出郇公朶朶寒
寄語地靈王學士九重今借指南看

遊白雲山

陳堂

為問仙蹤事有無
尋幽崑岫亦清都
臺空不見千年鶴
磧冷猶懸九節蒲
物外江山浮世界
雲間丹竈亂靡蕪
無才正欲從仙隱
落日跼蹐聽鷓鴣

登大科峯

陳堂

獨上樵峯最上頭
大科蕭颯黯然秋
望窮南北東西盡
水抱乾坤日月浮
劍氣憑陵吞六合
歌聲寥廓俯神州
翛然身世雲霄外
不數盧敖汗漫遊

同鄭使君七星巖

葉春及

青山如戟倚雲霄，仙去巖空鶴可招。
蜃市氣澄金闕出，龍宮雲閟玉書遙。
風生桂楫時呼酒，月冷松門夜聽簫。
濟世正憐公等在，漫圖生計向漁樵。

端州慶雲

葉春及

越裳東築受降城，回首長鯨蹴浪行。
非霧遠含松樹曉，斷虹先報峽山晴。
風雷一駕鼉鼉窟，日月雙懸驃騎營。
聞道光華歌聖世，將因並入管絃聲。

登飛來寺

葉春及

峽束澄江靜不流
深藏紺殿萬峯幽
玉環洞杳風生樹
金鎖潭空月滿舟
帝子南來山竹裂
仙人東去穀亭留
少年彩筆頻經此
捧檄重遊笑白頭

第一樓秋興

卽郡城鐘樓少年讀書於此

葉春及

萬石樓高切太虛
家貧還得此樓居
青山入戶寒偏瘦
綠鬢逢秋晚漸疎
北郭長楸朝騁馬
西隣明月夜吹竽
成都揚子惟清靜
門外無人只著書

題觀羅臺

葉春及

為愛羅浮四百峯，築臺江上看芙蓉。
青苔坐掃蛟龍動，白髮遊憐鶴鹿從。
雲起錦屏開絕壁，雨晴素練掛疎松。
問余石洞幽棲處，東望巔岼第幾重。

海珠

姚光泮

清秋珠海瘴雲空，露湛蒹葭夜正中。
一鑑光懸天上下，萬山晴映水西東。
岩堯銀闕涵江樹，浩蕩金波漾晚風。
載酒臨流人似玉，却疑飛度廣寒宮。

遊西湖懷蘇文忠

魏浣初

玉局文心絕代無
天教到處領西湖
不緣浪迹頻仙謫
爭得蠻鄉入畫圖
秋色斷橋連嶂起
寒鴉古木一亭孤
羅浮道士今何在
月出山空似可呼

遊西樵

郭櫟

一望樵湖野水分
奇峯截業絕纖氛
巖光半落仙人石
日影全遮玉女雲
四月餘寒生几席
九天空翠散氤氲
乘風便欲凌飛翰
漫向青霄訪道君

遊浮丘山

郭 棐

春暇相隨訪次寥五雲樓觀鬱宕堯虛堂白晝聞天籟
深洞青林濕露標海上丹砂何日就巖前烟樹此相招
閒來我欲跨玄鶴直上仙都度石橋

前題

張廷臣

綠樹春穠谷鳥啼仙山映帶曲池西譚玄擬見丹砂就
藉草翻憐玉液攜容與鳬鷺芳渚集參差樓閣暮雲齊
朱明此去蓬瀛近不似桃源路易迷

前題

區大相

海上何年大藥成，蒼茫島樹近東瀛。
烟霞似挹浮丘袖，風竹宜調子晉笙。
仙去壇荒丹井在，客來雲起毒龍迎。
憑誰共拾金光草，十二樓高近在城。

遊石室山

區大相

磴道紆迴碧霧盤，玉虛宮闕上巔巔。
何來靈氣真人御，不盡長風大壑寒。
洞口秋陰連薜荔，巖前空翠濕琅玕。
丹梯裊裊非塵世，鴻鴈冥冥愧羽翰。

前題

區大樞

彩霞飛自赤城標，雙棹凌空渡玉橋。
波上星辰三島接，湖中雲樹十洲遙。
層巖錦石晴相映，小洞桃花晚故飄。
共促仙杯駐顏色，醉來同聽紫鸞簫。

前題

王清

神斧何年奪化工，倚天鑿破玉芙蓉。
洞簫夜月來仙鶴，石壁春雷起蟄龍。
千古未勞金鎖合，四時長藉白雲封。
酒酣猶覺風生腋，疑在蓬萊第一峯。

前題

田汝成

曾聞宿石當空隕今見靈巖大地開
環極只疑霄漢上乘槎直拂斗牛回
盧敖天上鸞騶渺蕭史雲中鳳吹來
坐久恍然塵世迴白榆厯厯望三台

登玉廬峯

區大任

獨吹鐵笛一臨霞青玉壇邊散曉鴉
洞逼金華羊是石嶺疑緱氏鶴為車
瀑前木客支茶竈雲裏山都問酒家
莫遣移文羞澗壑周顒真欲老天涯

遊鐵泉精舍

區大任

巖前舊是子雲家門掩飛泉一道斜
石室竟藏高士傳
山園猶種故侯瓜
虎看丹竈多年火
樹掛詩瓢幾度花
小草尚慚曾出洞
至今猿鳥悵烟霞

遊靈洲山

吳桂芳

曾依京口望金山
海上重逢亦巨觀
仙掌高擎凌萬派
滄波東下見孤巒
雲移蜃閣中流駐
風送潮聲四面寒
勝地登臨春日暮
鄉心極目路漫漫

前題

郭大治

重謁蘇臺感素秋江山不改舊年遊
蕭蕭貝葉連青嶂漠漠楊花漾碧流
紺宇祇應留古跡瓊枝空自老丹丘
不勝仰止高山意赤碧金蓮思亦休

前題

葉夢熊

津頭相送意遲遲伐鼓開帆傍醉時
別去青山惟有夢竭來白髮漸成絲
穿林細聽風聲滿拄杖頻看鳥影移
獨怪醒餘天際隔峽雲汀柳轉淒其

前題

李開芳

海上驚看小六鼃故人天外騰揮毫蹉跎浪跡慙清境
停望寒江捲夜濤若問前身三島近相思回看七星高
蒼茫莫負靈洲勝笑把山花對濁醪

遊噴玉巖

甘學

息履巖頭再振衣千秋回首憶同誰水聲不似當年響
石壁猶存去日詩野老掃苔驚客暮山花催鳥報春遲
未知真隱歸何處斜照闌干半謝時

遊白雲洞

譚清海

西樵勝跡朝元洞萬丈丹梯紫翠連
濯雨飛虹凌白日
出雲孤劍插青天
靈姬玉瑟秋仍響
仙客龍宮夜不眠
谷口紅塵車馬度
金函玉簡向誰傳

登聚仙臺

霍尚守

妬人風雨喜初收
千仞危臺夏亦秋
芳樹遠分孤嶼色
丹崖晴照大江流
欣逢謝傳登臨興
笑效盧生汗漫遊
更聽玉簫鳴夜月
風流不數武昌樓

遊都嶠山

曾仕鑑

洞門春盡紫烟重勾漏西來見此峯
赤日空林啼虎豹青天飛翠濕芙蓉
高巖酒滴天花雨哀壑風傳石室鐘
更欲振衣凌絕壁碧桃千樹暮雲封

入羅浮

曾仕鑑

去年勾漏過寒食今日羅浮亦暮春
滿地松苓何歲月諸天宮闕自金銀
丹砂草碧迷仙令符竹煙深失羽人
惟有豫章祠下月清光長照水粼粼

七星巖

曾仕鑑

海上仙山散白榆
瑤花如雨墮清都
丹梯倒綴藤蘿黑
石室青含日月孤
駐舸樓臺觴隱映
入天鐘磬韻虛無
蓬萊清淺須臾事
一醉同君卧玉壺

遊曹溪

劉克正

道在無生悟者稀
遲來猶得款禪扉
天開寶地出龍象
人自祇園傳鉢衣
溪上雲霞常映帶
山中蘭若歲芳菲
勞勞塵土多年夢
暫向空門學息機

以上七言律

海珠

區大任

江遶前朝寺山開故國樓
匡床還對月楚客自吟秋
葉落禪房冷鐘鳴旅鴈稠
僧逢大小朗地即鳳麟洲
酒為攢眉去言從灌頂酬
寂寥師講後幻滅祖燈留
旂影閒霄梵潮聲急溟流
袁宏將訪道相約過羅浮

錦石巖

楊起元

化邑茲巖勝金仙自幻裁
丹青緣半壁珠玉落中台
水

帶西來意山當震旦開猿猴蒼木外雞犬白雲隈仙枕
盤牀睡龍聞說法來簷花晴亦雨山鳥倦還回太史藏
書室仙人煉藥臺彩雲飛玉宇佳氣接蓬萊同看烟霞
興慚無丹腹才長歌仍未盡呼酒更傳杯

石門山別友

黎正

北接梅關道南連穗石城潮隨滄海落山與白雲平遠
岫呈秋色斜陽弄晚晴僅離三舍影遙見半輪明綠樹
棲霞錦金波漾翠瓊牛羊來草墅烟火起柴荆歸客心

千里行途驛幾程
羣英羅偉饒尊酒
叙離情
風起征帆急
潮平去棹輕
鷗飛檣近
白山過
目留青對景圖
堪寫搜詩句
易成瓊臺入烟霧
儋耳限蓬瀛
惜別思投轄
銘心若斷纓
為公歌此曲
感激意縱橫

鄭端州邀星巖登高因之泛湖

葉春及

作賦三秋客
登高九日筵
寒蜚啼草露
雲鴈下江烟
洞窈層城外
山浮積水前
金箱圖五岳
芝闕儼羣仙
太守庭多暇
邀賓席屢遷
朝登松閣靜
夕返桂舟牽
簫鼓中

流震樓臺落影懸殊方黃菊節萬頃白鷗天棋拙逢強
敵杯深怯老年鶚冠吾自放鵬路爾俱騫良吏雙聯壁
酣歌獨扣舷醉非風側帽歸愛月隨鞭何必東籬酌玉
弘有酒錢

遊靈洲山

梁有譽

東坡不可作遺像見丰標臺接丹丘月門臨滄海潮一
官空白首十載為青苗玉簡芳名紀瑤編綺思饒感時
真笑賈著論每凌晁伊昔金蓮遇何年斷梗飄投珠人

共惜毀壁妬難消舊蹟嗟平漫荒祠更寂寥砌閒衰草
積牖暗蒼雲飄懷古難成調思君詎可招丹青猶藹藹
松檜已蕭蕭漁火連江暗禪鐘振壑搖旅懷多感激行
矣寄長謠

以上五言排律

遊西樵山

王學曾

高秋結侶泛孤航遙陟西樵共采芳
萬仞丹梯雲竇杳千山紅葉澗聲長
凌霄老桂香初藹待月天池夜未央

晨爽杖藜尋幻蹟朝暉倒影聚仙房瑤臺怪石嶙峋現
丹嶠叢霞縹緲光巖列九龍棲燕雀天開雲谷蔭松篁
玉崖瀑落珠簾璨石室雲生古木蒼竈冷久湮仙子舄
砌陰空隱薜蘿牀振衣攀躡大科頂把酒逍遙見日傍
奏技能令天一笑憑虛何異鶴孤翔層巒疊嶺如羣埴
赤縣神州布八荒錯落錦巖烟澹蕩峻嶒虹洞翠飛揚
雲泉不減風雷壯曲沼頻傳主客觴孤劍插天凌日月
石橋流水奏笙簧坐來頓覺塵心淨歌罷寧知醉態狂

興盡不妨歸棹促出山聊賦遠遊章

以上七言排律

度大庾嶺

汪廣洋

春深長憶出秦關寒擁貂裘馬上還今日入關春更淺
野花紅白草爛斑

坡山

湛若水

白蓮池畔訪仙蹤曾聽攢眉夜夜鐘七十年前燈火地
東尋無路白雲封

春草園

梁儲

綠徧江南夢不知何人今見畫中詩
瑤琴一弄香烟歇
滿眼青青亦自疑

峽山飛來寺

海瑞

峽中奇勝擬蓬萊想是當年欲建臺
天恐此方窮土木
故令神物特飛來

題西樵山留石

劉克治

一片雲根竹徑斜千秋長屬列仙家
崢嶸疑是支機石

笙鶴同君醉弄霞

遊靈洲山

林煙

孤峯突兀水縈迴
艤棹攀巖覽勝來
不見當年蘇學士
空留遺跡妙高臺

遊蒲澗

王漸達

九節菖蒲生澗烟
人傳此地駐飛仙
何當共覓安期跡
數到蓬萊清淺年

江門三首

曾仕鑑

廬阜晴開碧玉樓十年三度此維舟
伊人何處兼葭暮縱有青樽不管愁

迴合青山一水分萬家煙樹接黃雲
孤舟酒醒江門月蓬裏梅花盡夜聞

鷺宿沙青江水空楚雲回首月明中
長風鼓柁匡門去萬里滄波興不窮

馬鞍岡

董其昌

鞭石何年自海東平岡一踔類行空
標形笑取山為馬

不入驪黃牝牡中

望夫石

徐渭

海天萬里渺無窮
秋草春花插髻紅
自送夫君出門去
一生長立月明中

白雲洞

梁可澗

人遊仙洞多迷路
惟有仙人路不迷
一片白雲開洞口
野人還往小巖谿

以上七言絕

廣東通志卷六十一